

Guijtz Ni Rojp Lo Reben Tesalónica

Rucuaanu guiitzre lojtu, rexpən Jesucrist ni rbäjz guedx Tesalónica

¹ Narä Pabl, näjza Silvan näjza Timoteu, cacuaanu guiitzre lojtu, rebejtznu ni yu' guidoo lo guedx Tesalónica, reni yu' lo Dios Xtadnu näjza lo Dad Jesucrist. ² Gacnäj Dios Xtadnu näj Dad Jesucrist la'tu, guscuecdxizareni lajztu.

Gun Dios yälguxhtis loj reben DOJL che guibi' Jesucrist lo guedxliuj

³ Bejtznu, rudeednu xquixtios lo Dios xcuenttu, si'c riäjł jiennuni, sa'csi xcälirilajztu siädroobru, näjza yälrinälajz ni rajp tejgatu näjza sa'tu siädroobruni. ⁴ Ni'cni rliä'pnu xpala'ntu neñ reguidoo xten Dios. Rbaa lajznu sa'csi rsiudzu'tztu sanuutis rililajztu xtidx Dios mase rdejdtu trabajw, rusacsí bejntu. ⁵ Dee ruluiipac xcälguxhtis Dios najc laaca, ni'c rnii Dios riäjł jiu'tu lo xcälrnibeeni sa'csi cadejdtu trabajw xcuent yälrnibeega.

⁶ Sa'csi rujn Dios xhigab riäjłza quiix reni ba-teedtu trabajw xtojłreni, ni'c suteedzani reni'c trabajw. ⁷ Niluxh la'tu ni cadejdtu trabajw, sujn Dios gusilaznäjtu nuure che guluiiloj Jesucrist, siriini xhaguibaa siädnäjni rexanglni ni sajc, ni rnibeduxh. ⁸ Lo te balduxh siädäni, dxejc guisloj susacsíduxhni reni di gañ Dios, dizareni gusoob xtidx Dad Jesucrist nani rudzucaj DOJL.

⁹ Guiraareni sidejdreni trabajw, par tejpas agunijtreni, zijt chureni lo Dios, lo yälrdimbicha' xten xcälrnibeeni. ¹⁰ Che jiäd Dad guiriini xhaguibaa, dxejga siliä'p rexpejn ni xpala'nni, sidxelojza renani huililajz laani näjza la'tu, sa'csi huililajztu diidx ni basule'nu che guyu'nu lojtu.

¹¹ Ni'c rniabtisnu lo Dios por la'tu, rniabnu lo Dios guinaj lajz ni nabajntu si'c riäjĵ guibajntu reni guleni. Rniabzanu guniidx Dios lojtu guntu guiraa redzunsac ni rchaglajz Dios guntu, gacnäjzani la'tu con xcälrnibeeni te guntu redzuun ni rujntu sa'csi rililajztu. ¹² Te chä'p xpala'n laj Dad Jesucrist si'cni nabajntu, te laani guiliä'pzani xpala'ntu, xcuent yälrinälajz xten Dios näjza Dad Jesucrist.

2

Bendolduxh

¹ Naj, rniabduxhnu lojtu bejtznu, xcuent dxej ni jiäd Jesucrist, dxej ni guidojppzanu lojni, ² na'c chugajtu yarsia'. Na'cza gusaantu guchejbreni la'tu con diidx ni rulii te bejn ni najc profe't, nicla con diidx ni rnii stee bejn lojtu, niclaza con diidx ni naareni lojtu caj loj te guiijt ni naareni baxhalnu lojtu, cadre caj “dxej ni guibi' Jesucrist abidzujntu”. ³ Na'c gusaantu gusguee bejn la'tu xcuent rediidxre. Che gajd dxejga guidzujntu, su' bejn ni sibälaz xtidx Dios, dxejc suluiloj beñlatsiaduxh, xi'n nani sinitloj par tejpas. ⁴ Bejnre siliä'p lagajc xpala'nni, sidxe'chni lo guiraa ni sanä laj Dios, näjza xhitis ni rajntu bejn, te cueni nen xquidoo Dios, guluilojni si'c lagajc Gueb Dios.

⁵ ¿La di lajztu guisaj cheni guyusicä lojtu, rniä rediidxre lojtu, ä? ⁶ Naj la'tu anajntu xhini'c ruscuääzni, te na'c guiricajni ansde guisa' redxej xtenni. ⁷ Te yälxhiga'tz najc dzunlatsiaj ni alacayajc lo guedxliuj, cayäädxtis guibicaj nani caguscüääzni galäiini. ⁸ Dxejc suluiloj beñlatsiaduxhre. Niluxh Dad Jesucrist, sugu'tnini con bero'ni, che guibi' Jesucrist lo guedxliuj xpianijni sujn nitlojni. ⁹ Beñlatsiaduxhre najc si'cpac najc beñdxab. Che guidzujñni, guidzujñni si'c te bejn nani rnibee, sujñni seen, sujnzani milagrw ni rusguee. ¹⁰ Con xcällatsiaj bejnre susgueeni guiraa renani alagunijt lo Dios sa'csi direni nicäjb ninälajzreni didxlii ni nuslaareni neñ dojl. ¹¹ Ni'cni susaan Dios jiäd te yälrusgueduxh te chalilajzreni didx-xhii. ¹² Te gabijl jii guiraa renani di nicäjb nililajz didxlii, alga bidxaglajzreni yällatsiaj.

Reni gule Dios guirii neñ dojl

¹³ Niluxh nuurnu riäjł gudeedtisnu xquixhtios lo Dios por la'tu, bejtznu, ni sanälajz Dad Jesucrist. Rudeednu xquixhtios sa'csi galooli gule Dios la'tu te guslaani la'tu lo dojl, xcuent Xsprit Dxanni ni rusia lastootu, näjza redidxlii ni huililajztu. ¹⁴ Ni'cni che biejn diajgtu diidx ni basule'nu lojtu, gurejdx Dios la'tu, te xca'zatu xcälrdimbicha' Jesucrist.

¹⁵ Naj bejtznu, colchanuu, colsudzu'tz, na'cza jiällajztu rediidx ni balijdxnu la'tu che guyu'nu ro'c, näjza rediidx ni bacuaanu lo guiitz ni baxhalnu lojtu. ¹⁶ Lagajc Dad Jesucrist, näj Dios Xtdanu, ni sanälajz nuurnu, ni ruscäjñ lajznu par tejpas, ni baniidx xcälrbääznu racnäjni nuunu,

¹⁷ guspaani lajztu, gusudzu'tzni la'tu lo guiraa redidksa'c ni guiniitu näjza redzuunsa'c ni guntu.

3

Colnab lo Dios xcuent nuurnu

¹ Bejtznu, colnab lo Dios xcuent nuurnu te chanuu guire'ch xtidx Dad Jesucrist, te che gusoob bejn diidxga chä'p xpala'n diidxga, sigajcni gujcnj ni la'tu. ² Colnabza lo Dios xcanäjni nuurnu te di tednu ladzñaa rebenlatsiaj, rebenguijdx, sa'csi xhet guiraadi bejn rajp yälrlilajz. ³ Dios rusooob xtiidxnj, susudzu'tzni la'tu, sacnäjzani la'tu te di sactu dolgujdx. ⁴ Abascuedxi Dios lastoonu xcuenttu sa'csi anancheenu cayujntu guira'ti nani gunibeenu guntu, luxh si'cza sinuu gusoobtu xtiidxnj. ⁵ Canabä lo Dad Jesucrist guniidxnj gacbeerutu xcälsanälajz Dios, canabäza colcuedcxi lajztu si'cni bejn Crist che gudejdni trabajw.

Nanab jiennu dzuun

⁶ Bejtznu, con laj Xtrad Jesucristnu, rnibeenu guibicajtu lo chutis te sa'nu ni ricanzajtis, ni di rlaiz gunni dzuun. Guibicajzatu loj reni di guibajñ si'cni baluiinu riäjñ guibajñtu. ⁷ La'tu anajntu xho riäjñ guibajñtu, chanuutu guntu si'cni riennu nuure. Najntu nuurnu dinu nicanzaj che guyu'nu lojtu sa'csi biennu dzuun. ⁸ Dizanu nidauxlia'xcu'n chu tejtju; guiraani bidiixnu, biennu dzuun dxej-yääl, te di nutaalnu xtzuun chu tejtju. ⁹ Masä nungäjñ niniabnu niacnäjtju nuurnu, dinu niniabni; alga biennu dzuun te baluiinu xho chanuutu. ¹⁰ Cheni guyu'nu lojtu, gunibeenu scree guntu: Chutis ni di rlaiz gun dzuun di riäjñ xca'ni

xhi gauni. ¹¹ Aguniireni loonu baltitu rcanzajtis, direni gun dzuun, alga rihuiireni xhi cayujn rebejn. ¹² Rulijdxnu rebejnre, rnibeenureni con laj Xtdad Jesucristnu: colcuedxi, colyejn dzuun te gautu.

¹³ Bejtznu, na'c guidxajgtu guntu dzunsa'c.

¹⁴ Palga yu' chu tejtu di gucuadiajg xtiidxnu ni caj lo guijtzre, colhiii chuni'cni te na'c guchaagtuni, te guitujyni. ¹⁵ Niluxh na'c ga'ptuni si'c ni rdxe'ch lojtu, colguliidxni si'c bejtztu.

Rusadiidxnireni

¹⁶ Gueb Dios xten yälrbexi, guscuedxi lajztu guixe-guixee, masä xhitis sajctu. Jiannäj Dad Jesucrist guiraatu.

¹⁷ Narä, Pabl cacuaä xtixtiosre con naäpac si'c runä lo guiraa rexquitzä, scree rucuaä. ¹⁸ Gacnäjä Xtdad Jesucrist guiragajctu. Sugacni si'c.

Xtidxcoob Dios ni biädnä dad Jesucrist
New Testament in Zapotec, Mitla (MX:zaw:Zapotec,
Mitla)

copyright © 2006 Wycliffe Bible Translators, Inc.

Language: Zapotec, Mitla

Translation by: Wycliffe Bible Translators, Inc.

Zapoteco, Mitla [zaw], Mexico

Copyright Information

© 2006, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Zapotec, Mitla

© 2006, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 22 Feb 2024 from source files
dated 29 Jan 2022

5cff1274-8dc3-5398-a94d-f6033bb363c9